

Awo mester warda riba 'shareholders' agreement'

20 dia extra pa desaroyado di Hard Rock Hotel

ORANJESTAD - E tardanza den e proceso di traspaso di tereno pa e desaroyado di Hard Rock Hotel pa luga di ex Bushiri Hotel, no a wordo solucionada. Hasta a duna e desaroyado mas tempo pa cumpli cu exigencia financiero.

Diabierna pasa gobierno a reuni cu e desaroyado, Southwest Horeca Development y AIB cu ta e banco cu mester percura pe proceso financiero. Esaki minister encarga cu Turismo, Otmar Oduber, a

duna di conoce.

A sali na cla cu e grupo a haci un peticion di 20 dia adicional pa nan por caba di firma e shareholders' agreement pa asina AIB caba di formaliza e Loan Commitment Letter necesario pa traspasa e propiedad unda ex-Bushiri tabata ubica. "E acuerdo aki ta encera cu e shareholder lo precura pa 40% di e monto di inversion wordo haci. Mester menciona acerca cu tanto e desaroyado como e banco ta cla pa pone e performance bond rekeri dor di Gobierno como parti di e condicionnan

pa e traspaso di e tereno", segun minister Oduber.

Papel necesario

E noticia aki a sali ayera nochí lat, pues Bon Dia Aruba no por puntra e mandatario cu esaki ta nifica cu e parti financiero ainda no ta full cla. Pasobra e minister a laga sa ayera tambe cu: "Una bes cu e shareholders' agreement ta firma, AIB Bank lo cuminsa cu e proceso di reconfirma e fondonan aloca di e otro institutonan financiero cu lo participa den e financiamiento y confirma esaki den un carta

di compromiso di financiamiento."

Bon Dia Aruba kier puntra e minister tambe con e noticia aki ta cuadra cu e declaracion di e mandatario mes riba 2 di mei unda el a anuncia cu den e proximo 10 dia lo cuminsa cu e tumbamento y limpieza di e tereno, pasobra den e periodo aki lo finalisa e traspaso di e tereno. Ora e fecha a pasa sin progreso, e partidonan envolvi a indica na prome instancia cu ta pa motibo di "falta cierto papel ainda" sea "departamento di impuesto no a manda un pa-

pel necesario", sea otro error cu e papelnan necesario. Si man pasa minister Oduber a bisa cu e papel na notorio no tabata corecto pa por pasa e tereno.

Limpieza

E noticia di ayera si a menciona e progreso den e limpieza di e tereno y kita e ruina. "Southwest Horeca Development a confirma cu a selecta y paga e downpayment na e compania cu lo haci e limpieza di e propiedad incluso eliminacion di e edificionan", segun e minister. □